



N° 7170
Entrée le 14.11.2022
Déclarée recevable et urgence non-reconnue
Président de la Chambre des Députés
(s.) Fernand Etgen
Luxembourg, le 14.11.2022

Fernand ETGEN
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 14/11/2022

Här President,

Sou wéi den Artikel 81 vun eisem Chambersreglement et virgesäit, bieden ech lech, dës dringend parlamentaresch Fro un de Minister fir Immigratioun an Asyl weiderzeleeden.

A menger parlamentarescher Fro vum n°5902 wollt ech vum Minister wëssen, ob et wouer dass, dass Flüchtlinge bei hierer Ukonft zu Lëtzebuerg et verbuet kréien, fir hier Hausdéiere mat an d'Flüchtlingsfoyeren ze huelen. De Minister hat deemools Folgendes dorobber geäntwert:

"An dëser Structure d'hébergement d'urgence Kirchberg (SHUK) ass eng designéiert Plaz ageriicht mat Déiere-Boxen, wou de geflüchte Leit hir Déierekënnen ënnerbruecht ginn. D'Inspection vétérinaire kennt emol an der Woch an d'SHUK fir all d'Déieren ze chippen, ze impfen an z'entwuermen.

Aktuell sinn all d'Leit déi Déiere matbruecht hunn an der SHUK logéiert, mat e puer Eenzelfäll nach op engem anere Site, sou dass si sech net hu misse vun hiren Déieren trennen."

An engem Post op de soziale Medie vun enger Déiereschutzorganisatioun ass awer lo Folgendes ze liesen:

"Seid en Doneschten acceptéiert d'ONA keng Déiere méi an där Struktur um Kirchberg wou d'Flüchtlinge als éischt ënnerkommen. Ganz schwéier ze verstoen an och net ze acceptéieren. Am Mäerz, wéi di éischt Flüchtlinge mat Déiere bei eis an d'Land koume war dat effektiv eng ganz nei Situatioun wou organisatoresch ganz sécher eng Erausforderung war. Dat ass awer lo iwwert 8 Méint hir, sou dass een eigentlech misst kënnen erwaarden dass dat mëttlerweil keen Thema méi dæerft sinn. [sic]"


An deem Zesammenhang wéilt ech dem Minister dës Froe stellen:

1. Kann de Minister bestätegen, dass keng Déieren méi an der SHUK akzeptéiert ginn? Falls jo, zënter wéini géllt dëst Verbuet a wat ass de Grond dovunner?
2. Wat huet zënter der Äntwert vum Minister am Mäerz geännert, déi dëst Verbuet rechtfäerdeg?
3. Wat geschitt mat den Déieren, déi vun hieere Proprietäre getrennt ginn?
Kann de Minsiter versécheren, dass d'Déieren net wäerten ageschléiert ginn?



www.piraten.lu

Mat déiwem Respekt,

A handwritten signature in black ink, consisting of several fluid, overlapping strokes that form a stylized, somewhat abstract shape.

GOERGEN Marc
Deputéierten





**Äntwert vum Minister fir Immigratioun an Asyl Jean Asselborn op d'parlamentaresch Fro N°7170 vum
14. November 2022 vum honorabelen Députéierten Här Marc Goergen**

1. Kann de Minister bestätegen, dass keng Déieren méi an der SHUK akzeptéiert ginn? Falls jo, zënter wéini gëllt dëst Verbuet a wat ass de Grond dovunner?

Et ka bestätegt ginn, dass säit dem 10. November 2022 keng Déiere méi am neien Zentrum vir d'éischt Opnam Tony Rollman ënnerbruecht kënnen ginn.

2. Wat huet zënter der Äntwert vum Minister am März geännert, déi dëst Verbuet rechtfäerdeg?

Opgrond vun den Enkpäss an allen Ënnerkonftsstrukture vum Nationale Büro fir Opnam (ONA) fir Demandeure vum Internationale Schutz (DPI), assuréiert den Zentrum vir d'éischt Opnam, Tony Rollman, nieft dem Primo-Accueil vu Persounen, déi aus der Ukrain geflücht sinn, och de Primo-Accueil vun den DPI. En vue vun dësem Changement an der gréisserer Unzuel vu Persounen, déi doduerch um Site hebergéiert sinn, muss d'Sécherheet vun de Leit an d'Hygiène um Site kënnen garantéiert ginn.

3. Wat geschitt mat den Déieren, déi vun hire Proprietäre getrennt ginn? Kann de Minister versécheren, dass d'Déieren net wäerten ageschléifert ginn?

D'Déiere ginn net vun hirem Proprietär getrennt, mee Beneficiaire vun der Protection Temporaire (BPT) gi mat hiren Déieren an eng aner Ënnerkonftsstruktur relogéiert. An dëser Struktur gëtt d'Prise en Charge vun den Déieren adequat assuréiert. Donieft ka natierlech verséichert ginn, dass an dësem Kader keng Déiere wäerten ageschléifert ginn.

Lëtzebuerg, den 14. Dezember 2022

Den Immigratiouns - an Asylminister

(s.) Jean Asselborn